

KERATAN AKHBAR

TARIKH : 21 JULAI 2023
AKHBAR : BERITA HARIAN
MUKA SURAT : 13

Segera pulih ekonomi tingkat semula kuasa beli rakyat



Segera pulih ekonomi tingkat semula kuasa beli rakyat

Mia Sara
Mohamad
Azman,
Bukit Mertajam,
Pulau Pinang

Hari ini sebungkus nasi lemak biasa boleh mencecah hingga RM2.50. Harganya akan meningkat jika ia turut dilengkapi dengan pelbagai hidangan lauk pauk lain misalnya rendang atau ayam goreng. Agak sukar lagi untuk kita memperoleh sebungkus nasi lemak pada harga RM1. Semuanya disebabkan faktor kenaikan

harga barang yang menyebabkan penjual nasi lemak pun perlu menaikkan harga.

Kenaikan harga barang dikaitkan dengan inflasi yang lazim diukur melalui pengiraan Indeks Harga Pengguna (IHP). Ekonomi sesebuah negara yang mengalami inflasi semestinya akan memberikan kesan besar kepada perbelanjaan isi rumah pengguna.

Dalam konteks ini, lebih 50 peratus perbelanjaan isi rumah digunakan bagi tujuan perbelanjaan makanan minuman, bil utiliti dan petrol.

Inflasi terjadi disebabkan permintaan barangan dan perkhidmatan dalam pasaran meningkat secara mendadak yang tidak mampu ditampung oleh bekalan dan penawaran oleh pembekal, peniaga serta penjual.

Keadaan ini akan menyebabkan peniaga dan penjual tiada pilihan, selain terpaksa menaikkan harga barangan dan caj perkhidmatan bagi memenuhi permintaan tinggi pelanggan.

Namun, kebimbangan utama apabila harga barangan meningkat, pastinya kuasa pengguna untuk membeli berkurangan dan menyebabkan kesan kepada pertumbuhan ekonomi negara.

Nilai ringgit Malaysia yang terus jatuh menyebabkan pengaliran modal jangka pendek ke luar negara. Keadaan ini secara tidak langsung akan memburukkan imbalan pembayaran negara. Kebanyakan barangan keperluan perlu diimport, walaupun pada ketika nilai ringgit terus merosot. Ini menyebabkan kos bahan mentah, operasi, tenaga, pengeluaran dan pengedaran meningkat.

Kenaikan harga barangan pada hari ini membuatkan kita semakin berhati-hati dan berjimat cermat dalam perbelanjaan. Misalnya lebih kerap membuat perbandingan harga dan mengurangkan tabiat makan di luar.

Namun, apa yang perlu disegerakan adalah merencanakan kembali ekonomi negara dan menarik pelaburan asing.